

Zeitschrift: Igl Ischi : organ della Romania (Societat de Students Romontschs)
Herausgeber: Romania (Societat de Students Romontschs)
Band: 68 (1983)
Heft: 20

Artikel: Conta laud al Scaffider
Autor: Vincenz, Maria
DOI: <https://doi.org/10.5169/seals-881699>

Nutzungsbedingungen

Die ETH-Bibliothek ist die Anbieterin der digitalisierten Zeitschriften auf E-Periodica. Sie besitzt keine Urheberrechte an den Zeitschriften und ist nicht verantwortlich für deren Inhalte. Die Rechte liegen in der Regel bei den Herausgebern beziehungsweise den externen Rechteinhabern. Das Veröffentlichen von Bildern in Print- und Online-Publikationen sowie auf Social Media-Kanälen oder Webseiten ist nur mit vorheriger Genehmigung der Rechteinhaber erlaubt. [Mehr erfahren](#)

Conditions d'utilisation

L'ETH Library est le fournisseur des revues numérisées. Elle ne détient aucun droit d'auteur sur les revues et n'est pas responsable de leur contenu. En règle générale, les droits sont détenus par les éditeurs ou les détenteurs de droits externes. La reproduction d'images dans des publications imprimées ou en ligne ainsi que sur des canaux de médias sociaux ou des sites web n'est autorisée qu'avec l'accord préalable des détenteurs des droits. [En savoir plus](#)

Terms of use

The ETH Library is the provider of the digitised journals. It does not own any copyrights to the journals and is not responsible for their content. The rights usually lie with the publishers or the external rights holders. Publishing images in print and online publications, as well as on social media channels or websites, is only permitted with the prior consent of the rights holders. [Find out more](#)

Download PDF: 01.04.2026

ETH-Bibliothek Zürich, E-Periodica, <https://www.e-periodica.ch>

Conta laud al Scaffider

da sora Maria Vincenz

Conta laud al scaffider, ti aurora,
che cumparas en splendur sur la pezza.

Conta laud al scaffider, ti suleagl pompus,
tes radis d'aur dattan glischur ed embratschan tut quei ch'ei creau.

Conta laud al scaffider, ti radi finet,
mo in sulet gia po fugentar profunda stgiraglia.

Conta laud al scaffider, ti suleagl primavaun,
che carmalas nova veta ord la tiara, en iert e sin pradas.

Conta laud al scaffider, ti suleagl matutin,
ti eis simbol per Pastgas, il grond di da nies spindrament.

Conta laud al scaffider, ti glina clara,
glisch mudesta da notg, che fas ruasseivel tiu tur.

Cantei laud al scaffider, vus steilas nundumbreivlas,
che sbrinzeis tras la notg e rumpeis la stgiraglia.

Conta laud al scaffider, ti vent che sussuras,
tras caglias e feglia.

Renda honor al scaffider, ti pezza pompusa
ferm francada el profund dalla tiara.

Renda honor al scaffider, ti pezza gigantesca,
luschezia da nossa patria.

Renda honor al scaffider, ti pezza pussenta,
simbol da nies Diu maiestus.

Rendei honor al scaffider, vus cuolms e muntognas,
cun voss'aria pura e fina.

Rendei honor al scaffider, vus cuolms e muntognas,
englars da ruaus e silenzi, e da magnifica survesta.

Rendei honor al scaffider, vus glatschers imposants,
ludei el, gie ludei el en perpeten.

Giubilescha, ti fontauna alpina
ch'ensiaras e resplendas misteris divins.

Giubilescha, ti fontauna sgurghiglionta,
ti scazi prezius ed indispensabel.

Giubilescha, ti fontauna profunda
che frestgentas e rinforzas il staunchel viandont.

Giubilescha, ti fontauna viventa
sanctificada tras il misteri dil batten.

Giubilescha, ti laghet agl ur dalla pezza.
tschiel e tiara resplendan en tei.

Giubilescha, ti lag carmelont cun tias undas stgirverdas,
che tschalattan migeivel, mo bein enqualga vehament.

Lauda Diu, tiu scaffider, ti valetta, ti dutg,
cu ti seglias sur crappa, ventireivels e leds.

Lauda Diu, ti cascada gigantica e spimonta,
che crodas gagliard sur greppa e grugns
e resplendas en melli colurs.

Lauda Diu, tiu scaffider, ti flum caminont,
ch'eis simbol pil carstgaun pelegrin.

Lauda Diu, tiu scaffider, ti rein admirabel,
che rimnas humiliteivel las auas dil dutg e dargun.

Lauda Diu, tiu scaffider, ti artg vid il firmament,
che formeschas la punt denter tschiel e la tiara.

Lauda Diu, tiu scaffider, ti pliev migeivel,
che bognas e lomias pastira, prau e curtgin.

Lauda Diu, tiu scaffider, ti daguot da clara rugada,
che frestgentas e protegias flur e verdin.

Conta laud al Segner, ch'quaisa e tarbatacchia
ti losch capricorn,
ti smeinas il scepter, ti retg e signur dallas alps.

Conta laud al Segner, ti tschess elegant,
cu ti tilas tes rudials egl azur.

Cantei laud al Segner, vus animals egl uaul e sin la prada,
scadin laudi siu scaffider sco el ha vuliu.

Cantei laud al Segner, ti maset e ti pasler sil persiel,
pertgei temeis vus l'umbriva da quel ch'a vus porscha l'aveina?

Conta laud al Segner, ti cara merlotscha sil spitg dalla plonta,
ti regordas nus la damaun e la sera d'alzar nos cors tier Diu.

Conta laud al Segner, ti parfinchel sil rom dil tscherscher,
ti leventas legria primavauna el cor da saun e malsaun.

Cantei laud al Segner, vus utschals, vus aviuls e vus tschittas,
vus deis perdetga d'in scaffider ch'ei plein fantasia.

Dai honor a Diu, ti tiara stgira, gest arada
che cuarclas e schurmegias il garnetsch.

Dei honor a Diu, vus zuolcs frestgs,
che empermetteis veta e naschientscha pigl avegnir,

Dei honor a Diu, vus sems gronds e pigns
che vegnis satrai ella tiara.

Dei honor a Diu, vus semets e garnins da dumiec e salin,
in di daventeis vus vivonda sin meisa ed altar.

Dai honor a Diu, ti fretg dalla vit,
ti suc sublim che rinforzas saun e malsaun.

Dei honor a Diu, vus fretgs dalla tiara,
schenghegiai a nus per nutrir pauper e reh.

Lauda e selegra, ti caglia e plonta,
nova veta pulsescha tras ragischs e tras best.

Lauda e selegra, ti uaul da feglia e guila,
ier aunc fuvas ti pass e nius, oz puspei en cumpleina verdur.

Lauda e selegra, ti tscharscher e maler,
vossa cumparsa semeglia in matg semtgaus per la spusa.

Lauda e selegra, ti brumbel misterius,
mo plaun e precaut scuvieras ti tiu scazi custeivel.

Lauda e selegra, ti verdin, ti pastget,
seigies buca trests, sche negin fa da vus menziun.

Lauda e selegra, ti pegn d'untgida cun roma braccada,
ti dattas schurmetg da bi e malaura.

Giubilescha e conta, ti viola pintga e mudesta,
malgrad che ti stos viver agl ur dalla senda.

Giubilescha e conta, ti flur cazzola,
ti stiarnas tiu aur senza mesira sin praus e collinas.

Giubilescha e conta, ti soldanella, ti animona,
empremas precursuras dalla primavera desiderada.

Giubilescha e conta, ti flur-stgalin, ti crocus en iert e ti clav dil parvis,
vies tgauet mira curaschus e segir tras la cozza da neiv.

Giubilescha e conta, ti rosa, ti regina biala, sublima e cara,
tgi che careza tei pren en cumpra las spinas.

Giubilescha e conta, ti steil'alva e ti striauna
custeivels ornaments dall'alp e dalla pezza.

Lauda il Segner, carstgaun, dalla scaffiziun eis la cruna,
engrazia al Segner, ch'el tei ha scaffiu suenter sia semeglia.

Lauda il Segner, ti affonet sil bratsch dalla mumma,
tes egls carins resplendan carezia e buontad divina.

Lauda il Segner, ti affonet cuntent, termagliont,
da tei savein nus emprendre: nossa veta duess esser in giug avon Diu.

Lauda il Segner, ti carstgaun giuven, plein forz'e vigur,
ch'enqueras sustegn e senn dalla veta.

Lauda il Segner, carstgaun, cun tut tes talents,
engrazia ad el, pertgei tut vegn dad el.

Lauda il Segner, carstgaun, ch'eis alla fin dil cuors dalla veta,
engrazia ad el da tut cor, remetta tia veta cumpleina
en ses mauns paterns.

Lauda il Segner, ti tiara, ti tschiel,
gie, ludei el – ussa – oz – adina – ed en perpeten. Amen.